

Inuussutissanik nersutillu nappaataannik inunntut tunillaassorsinnaasunik nakkutilliineq pillugu Inatsisartut peqqussutaata allanngortinneqarnissaanik siunnersuummut nassuiaatit

Nalinginnaasumik nassuiaatit

Kalaallit nunnaanni imermik imerneqartussamik uumassusilinnut tappiorannartunut tunngatillugu nakkutilliineq Nakorsaanerup kaajallaasitaa nr. 20, 26. januar 1990-imeersoq naapertorlugu ingerlanneqartarpoq. Kaajallaasitaq taanna Kalaallinut Nunaannut Ministerieqarfiup "napparsimmavinni nakorsaanerup Kalaallit Nunaanni atorfeqartunut ilitersuutaa" 16. april 1959-imeersoq inatsisitigut tunngavigalugu atulersinneqarsimavoq. Nunnatsinni peqqinnissaqarfik pillugu inatsisini pineqartoq taanneqarsimanngilaq. Taamaalilluni ullumikkut erngup imerneqartussap uumassusilinnut tappiorannartunut tunngatillugu misissorneqartarnissaanut inatsisitigut tunngavissat naleqquttuunngillat. Tamatuma saniatigut pineqartumut tunngatillugu akisussaassutsip agguanneqarsimanerani eqqoqqissaartitsinissaq amigaataavoq.

Innuttaasut peqqinnissaannut tunngatillugu imermik imerneqartussamik naammattumik pitsaasulimmik pilersorneqarnissaq pingaaruteqarpoq. Taamaattumik erngup uumassulinnut tappiorannartunut tunngatillugu pitsaasusissaanut piunnaasaqatit aalajangersarneqarnissaannut kiisalu imermik imerneqartussamik suliarinnittarffiit pilersuiffiillu aaqqissuunneqarnissaannut tunngatillugu inatsisiliorinissaq pisariaqarpoq. Aammattaaq nakkutilliinissamut malittarisassat aalajangersarneqassapput taamaalilluni uumassusillit tappiorannartut peqqinnissamut navianartorsiortitsisinnaasut paasilertorneqarsinnaaqullugit. Naggataatigut pitsaassutsimut piunnaasaqatinik unioqutitsineqartillugu akuliunnissamut malittarisassat aalajangersarneqassapput, taamaalilluni peqqinnissamut navianartorsiortitsisinnaasut naammattumik pinaveersimatissinnaaqullugit.

Allannguutissatut siunnersuummi oqartussaaffiup ingerlanneqarnissaa pillugu immikkut paragraffinik oqaasertalersuisoqanngilaq, tassami peqqussummi atuuttumi § 2-mi, naalakkersuisut qitiusumik oqartussaasuusut aalajangersarneqarpoq, kapitalit 3, 4 aamma 5 eqqarsaatigalugit kommuneqarfinni oqartussat naalakkersuisunit aalajangersarneqassapput, allannguutissatut siunnersuummi kapitalini pineqartutut. Taamaattumik allannguutissatut siunnersuut akuersissutigineqassagaluarpat kommunini oqartussat pillugit aalajangersaanissamut inatsisitigut tunngavissaq qularnaarneqartutut nalilerneqarpoq. Tamanna isumaqarpoq allannguutissatut siunnersuut Peqqinnissaqarfimmik nakkutilliisoqarfik pillugu nalunaarutip allanngortinnissaanut pingaaruteqartussaassasoq.

Erngup pitsaasusissaa pillugu nalunaarutip suliarineqarnissaani qularnaarneqassaaq nunatsinni malittarisassat erngup imerneqartussap pitsaasusissaa pillugu EU-mi peqqussummut (Erngup imerneqartussap pitsaasusissaa pillugu Siunnersuisoqatigiit

peqqussutaat 98/83 3. november 1998-imeersoq) naapertuuttuunissaat, taamaalilluni suliffeqarfiit inuussutissaleriffiusut EU-mut nioqquteqarsinnaanerata tamatumani akornuserneqaqqunagu.

Imeq nalunnguarfigineqartoq tamatumunnga assingusumik ajornartorsiuteqartitsisinnaammat allannguutissatut siunnersuummittaag ilanngunneqarpoq. Nunatsinni arlalinnik naluttarfeqalereerpoq aamma naluttarfinni erngup nalunnguarfigineqartartup aamma tatsit nalunnguarfiusartut il.il. isumannaallisaavigineqarnissaannut atatillugu nakkutilliineq pillugu inatsimmik tunngavissamik atulersitsinissaq isumatusaarnerusaaq.

Siunnersuut Peqqinnissaqarfimmik nakkutilliisoqarfimmut, Peqqinnissamut Pisortaqarfimmut, Aatsitassanut Ikummatissanullu Pisortaqarfimmut, Ineqarnermut, Attaveqarnermut Pilersuinernullu Pisortaqarfimmut, Aningaasaqarnermut Pisortaqarfimmut, KANUKOKA-mut, Nukissiorfinnut, Kalaallit Nunaanni uumasut nakorsaqaarnerannut pisortamut aamma Naalakkersuisut Allattoqarfiata Inatsisileriffianut tusarniaassutigalugu nassiussuunneqarsimavoq. Peqqinnissamut Pisortaqarfik oqaaseqarpoq, misissugassatut tigusat amerlanerusut aningaasartuuteqarnerulernermik kinguneqassasut, kisiannili 2001-imut aningaasanut inatsimmi ilassutitut aningaasaliissutini misissugassanik tigusat amerleriarnissaannut akiliutissat missingersuusiorneqarsimammata siunnersuut ataatsimoortillugu aningaasartuutitut sunniuteqassanngitsutut nalilerneqarpoq. Peqqinnissaqarfik pisinnaatitaaffiit agguarsimanerannut oqaaseqaateqarpoq. Inatsisartut peqqussutissaatigut siunertarineqanngilaq Naalakkersuisut ataatsimut allaffissornikkut aqutsinerata isummerfigineqarnissaa. Tamakku saqqummissapput erngup pitsaassusissaa pillugu nalunaarutissaq suliarineqalerpat.

Nukissiorfiit EU-mi peqqussutit piviusunngortinneqarnissaanut naalakkersuinikkut isummertoqarnissaa kissaatigaat. Peqqussutikkut siunertarineqarpoq erngup pitsaassusissaa pillugu nalunaarutissap oqaasertalersorneqarsinnaalernissaa. Nalunaarutissap taassuma annertussusissaa sunniutigisinnaasassaalu taassuma suliarineqarnerani oqallisigineqartariaqassapput.

Aalajangersakkanut ataasiakkaanut nassuiaatit

§ 1, nr. 1-imut

Paragraf taanna allanngortinneqarpoq aalajangersarumallugu peqqussut taaneqareersut saniasigut aamma erngup imernejartussap, inunnit tamanit nalunnguarfigineqarsinnaasup erngata kiisalu imermik saliiiffiusartut aamma pilersuiffiit aqqissuunneqarnerinut teknikimut - eqqiluisaarnissamut tunngatillugu uumassusilinnut tappiorannartunut tunngatillugu pitsaassusissaannut tunngasunik piumasaaqatinik aamma ilaqartoq. Uumassusilinnut tappiorannartunut tunngatillugu pitsaassutit pinngortitami akuutissat tungaasigut pitsaassuseq pinnagu, immikkut taaneqarnera pissuteqarpoq pinngortitami akuutissanut uuttuutit avatangiisit illersorneqarnissaat pillugu peqqussummi nassuiarneqarmata.

§ 1, nr. 2-mut

Matumani erngup pitsaassusissaanut piumasagaatinik naalackersuisut malittarisassiornissaminnut piginnaatinneqarput. Annertunerpaamik bakterianik akoqartutut soorluttaaq bakterianik uumaffigisaminnut naleqqussartartunik kiisalu bakteriat ilaannut immikkut ittumik napparsimalersitsisartunik akoqartunut piumasagaatit agguataarneqassapput. Soorunami pingaarnertut najoqqutassatut tamakkuninnga akoqassutsip sapinngisamik appasinnerpaaffigisamiinnissaa piumasarineqassaaq. Piumasagaatit immikkut ittut ilusilernerqassapput taamaalillutik EU-mi piumasagaatinut naapertuuttuussallutik taamalu nunatsinnit avammut nioqquteqarneq pitsaanerpaamik qularnaarneqarluni.

§ 1, nr. 3-mut

Naalackersuisut uumassusilinnut tappiorannartunut tunngatillugu erngup pitsaassusissaata nakkutiginnissanut malittarisassanik aalajangersaanissamut pisussaatinneqarput, taamatuttaaq suut misissorneqartarnissaannut, qanoq akulikitsigisumik aamma kikkunnit. Malittarisassat taakku ilusilersornqarnerannut atatillugu pingaartinneqassaaq peqqinnissaqarfiup nakkutilliinermut peqataalluni inissisimanissaa.

§ 1, nr. 4-mut

Naalackersuisut pitsaassusissanik piumasagaatit aalajangersarneqarsimasut malinneqanngitsut nakkutilliinikkut paasineqaraangat qanoq iliuuseqartoqartassanersoq maleruagassanik aalajangersaanissamut pisussaatinneqarput. Malittarisassanik ilusilersuinermi imermik pilersuinermut ingerlatsinikkut akisussaasup imermik peqqinnissamut ulorianaateqanngitsumik pilersuinissaminut akisussaaffeqarnissaa pingaartinneqassaaq. Malittarisassanik ilusilersuisoqassaaq nakkutilliinermut oqartussaasut pisariaqartinneqartunik peqqusisinnaanngorlugit inerteqquteqarsinnaanngorlugillu peqqissusermik ulorianartorsiortitsinerusinnaasup sukkasuumik sunniutilimmillu pinngitsoortinneqarnissaa qulakkeerniarlugu. Kiisalu qulakkeerneqassaaq inuttaasut taamatut pisoqartillugu peqqissusermik ulorianartortitsinerusinnaasumik kiisalu tamatuma akiorneqarnissaanut iliuusissatut malittarisassanik paasissutissinneqartarnissaat.

§ 1, nr. 5-imut

Paragraffi taanna oqaasertaligaavoq qularnaarniarlugu imermik suliarinnittarfiit imeqarfiillu aqqissuussaanerannut teknikikkut eqqiluisaarnermut tunngatillugu piumasagaateqartoqarsinnaanera, taamaalilluni imeqarfiit eqqiluisaarnikkut illersorneqarsinnaasumik aqqissuussaassammata.

§ 1, nr. 6-imut

Tassani inatsisitigut malittarisassat tamarmik ilanngunneqarput unioqqutitsisoqartillugu pineqaatissiisoqartarnissaanut inatsisitigut

tungavissaqarnissaq qulakkeerniarlugu. Arsaarinnittarneq ilanngunneqarmat tamatumunnga pissutaavoq imeq poortorneqarsimasoq maleruagassanut akerliusumik nioqqutissiarineqarsimaratarsinnaammat. Tassami imeq taamatut poortugaq arsaarinnissutigineqarsinnaasariaqarpoq. Akiliisitsinissaq periarfissiissutigineqarmat tamatumunnga pissutaavoq maleruagassanik unioqqutitsisoqartillugu aningaasanik iluanaarutit taamaaliornikkut peerneqarsinnaanissaat kiisalu siunissami malinnikkumallertitsisoqarsinnaalluni.